



**Senin, 20 September 2021**  
**Ogen : Ulangen 15:12-15**



**Bebaskan Temanndu**



**K**enca Jusup mate, kegeluhen bangsa Israel i Mesir mulai terancam. Raja-raja Mesir mulai lupa man Jusup, e maka keleng ate man kalak Israel si tading i Mesir e enggo urak. Keleng ate salih jadi segat ate, turah rasa cemburu erkiteken teremen kesusuren Israel asangken kesusuren kalak Mesir. Lit kebiaren Raja Mesir maka i bas sada paksa pagi enggo teremen kalak Israel i taneh Mesir e maka iakukenna pagi Mesir e sikerajanggenna. Erkiteken kebiaren e, ibahanna bangsa Israel e jadi budakna, subuk si dilaki bagepe si diberu. Ijadikenna bangsa e jadi pekerja berat, kuli mbangun tembok-tembok Mesir alu la dat upah. Tenaga iperas, tapi kesejahteraan la iperdiateken. Ngidah uga suina ate kalak Israel iperbudak i Mesir, ibereken Tuhan pedah erkelangken Musa sanga ia i bas perdalanan ku taneh Kanaan.

Pedah Tuhan e e me, adi lit pagi kalak ndayaken dirina man bandu jadi budakndu, arus maka ibebaskenndu ia kenca ia erdahin ras kam enem tahun. Kenca seh tahun si pepituken, arus maka ibebaskenndu ia. Sanga ibebaskenndu ia ola pelawes ia ngambe-ngambe. Berekenlah man bana alu melumbar kai si enggo idatndu bekas pemasu-masun Dibata: biri-biri, gandum entah anggur. Tuhan ngidah uga suina ate Israel tupung ia iperbudak, tenaga iperas, perpanna la iperdiateken, rikut ras anak-anakna kerina jadi budak. Mesui kal ate natap ndehara ras anak-anak si kitik denga pe enggo jadi budak. Ia lit i bas tekanen, kai pe sura-surana la pang ia nurikensa, tuanna erkuasa nandangi dirina.

La kal ngena ate Tuhan sistem perbudaken e. E maka ipersingetina kal gelah tuan-tuan si lit i tengah-tengah bangsa Israel mbebasken budakna i bas tahun pepituken. Bebas e ngatakensa tuan e lanai erkuasa i bas diri budakna, lanai banci bahanna bagi ate-atena. Mbebasken budak erkiteken Tuhan jine enggo mbebasken Israel bas perbudaken nari.